

# *In Beckham cunter tschintg Svizzers*

La fatschenta cun ils «klebers»

DA CLAUDIA CADRUVI / ANR

■ Il zercladur cumenza il campiunadi europeic da ballape a Portugal. Ils fans creschids na s'occupan anc betg da quest eveniment. Ils pitschens fans han dentant gia la fevra. Numnadain la fevra dals «klebers». Dapi intginas emnas vendan ils kiosks ils tatgaders da ballape da la «Euro 2004». In satget cun tschintg tatgaders custa 90 raps. Quai è pauc cumpareglià cun las chartas da Yu-Gi-Oh ch'èn da preschent era il hit. Lezzas custan 8.50 francs il pac. In pac cuntegna otg chartas.

## **Sgarmar milliuns**

Era sch'ils tatgaders da ballape custan relativ pauc, vegn la firma Panini a sgarmar ina pulita summa daners. La firma Panini a Modena ha la licenza da producir ils tatgaders che vegnan vendids en tut l'Europa.

I sa tracta d'ina fatschenta cun milliuns da francs ed euros.

Il quint è prest fatg: Ils uffants na sa cuntentan betg cun cumprar be dus u trais pacs tatgaders. Per rimnar ils tatgaders datti numnadain in album. En lez san ins tatgar ils giugadurs da tuttas naziuns che sa participeschan al campiunadi. En tut dovran ils uffants 334 tatgaders per emplenir l'album. Teoreticain custan ils 334 tatgaders 60 francs. Quest quint funcziunescha dentant be en la teoria. En la vita pratica vesi ora auter: Cun il temp cuntegnan ils pacs da tatgaders ch'ins cumpra adina dapli dublettas. Ils uffants possedan adina dapli tatgaders cun stars ch'els han gia en la collecziun.

## **Tschintg Svizzers per in Beckham**

Uschia cumenza la martanzia da barats. Ils uffants emprendan svelti ils trics e rampins da barattar. Clevers uffants s'accorschan immediat ch'els pon barattar in David Beckham cunter tschintg

giugadurs svizzers. E per in Svizzer obtegnan ins trais Grecs u quatter giugadurs da la Lettonia. Custaivels èn sa chapescha era ils tatgaders d'argient cun si ils simbols da las differentas naziuns u squadras.

## **Avantatg e dischavantatg**

Cun ils «klebers» emprendan ils uffants las reglas fundamentalas da l'economia. Els emprendan era in zic insatge dals pajais europeis, almain co che las bandieras vesan ora. Quai èn las varts positivas da questa fevra. Il dischavantatg: Ils geniturs dals pitschens fans ston puspè ina giada svidar las bursas.

Dal reminent: Per uffants (u geniturs) ch'èn unfis da cumprar ina massa pacs cun tatgaders ch'els possedan gia, datti la pussaivladad d'empustar ils tatgaders che mancan en l'album. L'adressa d'empustaziun è [www.stickers.ch](http://www.stickers.ch) u Figurine Panini, chascha postalas 59, 6574 Vira.